

國朝耆獻類徵初編卷百八十七目錄

疆臣三十九

管幹貞

蔣兆奎

阿林保

孫永清

弟藩
子爾準

國朝耆獻類徵初編卷百八十七

通奉大夫前署江西巡撫江西布政使司布政使湘陰李桓輯
疆臣三十九

管幹貞

管幹貞江蘇陽湖人乾隆二十四年舉人三十一年進士改庶吉
士三十四年散館授編修四十二年充貴州鄉試正考官四十五
年改陝西道御史四十六年轉掌貴州道御史四十七年十二月
命巡漕天津尋轉京畿道御史四十九年九月 命巡漕瓜儀
十月擢戶科給事中五十一年二月擢鴻臚寺少卿巡漕如故旋
授通政司參議八月以巡漕事竣入奏 命馳驛往臨清偕漕運

總督毓奇治事九月 命巡漕瓜儀五十二年二月授光祿寺卿
巡漕如故十月擢內閣學士五十三年七月擢工部右侍郎八月
充順天鄉試副考官五十四年四月充會試副總裁六月授漕運
總督九月奏劾岳州衛守備錢選縱所屬運弁爲湖北按察使李
天培私運材木督糧稽延又劾沔陽衛守備焦廷遴怠玩不職失
察吏役通賄作奸均論如律初糧船抵天津楊村或需起撥運丁
缺乏不能給舟值例由長蘆運司先以鬻鹽錢貸丁撥直隸藩庫
銀十萬兩歸款運丁分年納之官其後議革丁多不便幹貞請復
其事以紓丁力 從之十一月疏陳江西軍丁疲敝設策調劑一
行月二糧折價不敷應籌款增補以資口食一軍船積逋應請借

官銀代償仍令分年輪納以清積款一屯田應請寬限清釐以收實效如議行五十五年三月 賞花翎黃馬褂五月奏各省漕船百餘幫役夫數萬人五方雜處最易藏奸時有匪徒潛幫滋事竊思弭盜務絕根株防奸須除強梗與其嚴緝於犯事之後何如嚴禁於無事之時上年新漕伊始飭各幫召募嚴立規條日則按伍行走夜則守望支更既親自巡察復遣親信員弁易裝密訪乃知別有奸人既不在船亦非土著隨運潛行每遇閘壩募夫挽船卽從中把持勒索稍不遂意或勾結豪強肆行滋擾或偪教夫役索加傭值種種累丁不一而足臣督飭官役前後擒數十人遵例赴州縣官確擬從實發落不以遞籍了事得 旨嘉獎五十八年七

月疏言蘇州太倉重運分設總運丞倅二員由前漕臣咨請自水
次分督赴淮抵淮後改委赴通臣察二幫糧船並不由水次委督
中途分更督運官與旗丁不相認識恐所屬人意存蒙混及由淮
抵通又復更易遇有事故互相推諉甚非覈實急公之道亦與各
府事例不符議詳咨部部議仍令遵行如前臣思近年漕糧經
皇上指示再三事事便丁速運而速運之道首在責成道廳董戒
有法如中途更易非但官不習運丁不知糧未便以取結具文責
令接運且同係丞倅既可由水次督運赴淮無故到淮又行改委
停待交換沿途逗遛甚屬無益臣不敢因部行前漕臣咨案輒事
拘泥應請二幫運員分任督催自水次至通州始終其事庶官有

專司丁無蒙蔽疏入 上嘉之如議行幹貞屢以督運功 命部
臣議敘五十九年以疾乞假 諭毋庸開缺 命督臣書麟攝其
事疾愈任事如故六十年三月奏漕船到關放行向無畱滯自淮
關監督拉任稽察甚嚴停幫甚眾 命罷監督盛住任幹貞未詳
劾盛住稽畱苛刻情事 嚴旨飭之嘉慶元年戶部移咨上年倉
場議白糧幫正供運至通州以羨米爲耗與經紀代運入倉時運
丁已自交納而幹貞猶以無款可議爲辭旣又具疏入奏飾其
前說 命降二級調用仍交部臣嚴議尋議鐫職三年卒原名幹
珍乾隆六十年遵 旨珍改作貞

國家東南之利莫重於市而弊亦最大數十年來克殫厥職又以清操著聞者咸推清江楊勤愨公錫紱及滿洲鄂寶公其後吾鄉管公寶趾美焉公諱幹貞成進士時禮部改貞爲珍乾隆六十年有旨仍改原名字陽復號松崖自南宋以來世爲武進人曾祖淑考職州同知祖棟國子監生考景賢乾隆元年舉人公母娠勵七月而生生之夕舉人君夢神人負大旆書翰墨文章四字歷階升堂故初名又曰翰五歲而孤母史夫人苦節撫之嘗手錄鑑略以課年十一能屬文十九祖母陳夫人卒公以祖在雖不爲祖母服重而髻鬣喪父於心未安終三年未嘗與歲試乙亥補生員丙子中副榜貢生己卯中順天舉人丙戌大挑舉人初以知縣用旋

成進士改翰林院庶吉士己丑散館授編修明年以母喪歸甲午
分校順天鄉試乙未分校會試丁酉充貴州正考官戊戌充教習
庶吉士庚子改陝西道監察御史掌貴州道辛丑巡視西城轉京
畿道癸卯巡視天津漕務是秋掌京畿道復視西城冬巡視南漕
遷戶科給事中乙巳再視南漕丙午遷鴻臚寺少卿通政司參議
協理漕運總督事仍視南漕丁未遷光祿寺卿內閣學士充文淵
閣直閣事戊申再 命協辦漕運總督晉工部右侍郎署吏部右
侍郎充順天鄉試副考官己酉充會試總裁官授漕運總督加兵
部侍郎右副都御史銜庚戌三月 大駕東巡 賜孔雀翎黃馬
褂乙卯京察一等丙辰 召與千叟宴其在翰林直史館任譔文

斤斤以品節自勵四庫館開纂修者得保謄錄人爭趨之以便其私當事欲以相屬獨辭不與札薩克蒙古外藩王公勅立表傳眾難其人公任總纂五日定議二年而書成其視西城城牒皆親斷立發劾左翼稅局濫罰牲隻及副指揮馬爲圮改供縱犯勢要請託槩不得遂暇卽周行郊內外凡命案竊案捕之輒獲其視天津漕楊邨方封雇民舟爲剝船至數歲不得釋又牖外幫有無弁無兵者公皆奏上之及視南漕幕無一人從容自理時漕船回空多守凍公以打冰須先通下游若治上游則冰凌下注益增堅厚如其法遂無守凍之患山東江南不雨雖挑濬運河漕艘仍阻公具陳雨少河無源開壩遲前後之阻有故因附陳河湖水利略言漕

船之速在運河運河又以諸湖爲水櫃誠使節節疏通雖遇旱澇
可以節宣否則雨少無籌濟之方雨多無容水之地至引黃入運
亦一時權宜苟水利充盈黃河全力下注運河自不致停沙又奏
駱馬湖蓄洩事宜所言皆中窾要並得 旨議行其總督漕運首
減浮款添給江西幫行月糧請畱直隸借款銀十萬兩交長蘆鹽
政易賣鹽錢文濟楊邨諸幫撥價又請蘇州太倉押重運官倣江
南通省例自水次到淮不得更換又請河南豁免緩徵停運減存
之舟就近赴山東受雇撥運又請各幫水手短絳責成頭舵工以
素識誠實之人充補免聚眾竊盜諸累皆報 可時各省開兌多
至春初又在在逗遛遇水淺及河溢之年有在河北度歲者公嚴

飭弁丁修艤受兌復冬兌冬開舊制速僉盤以免守候撤委員以
絕滋擾嘗策馬躬自督催風雨弗避或不歸所乘舟支帳露宿微
弁出力必親慰勞運丁舟人不用命立予懲罰當時或苦其苛急
及回空省費無絲毫派累咸大悅服五十八年春積勞感疾奏請
開缺 上命安心調理使總督書麟公就近兼攝乃不敢辭稍愈
卽起視事然自是精力始耗矣初白糧運京倉勵十之一偶值輪
派以爲畏塗會有新令令全運至京而未籌運費倉場侍郎使運
丁以諸舟餘米給坐糧廳經紀代運浙江黽勉行之江南餘米少
丁情不便公以咨部倉場奏江南次年已曾具結不應仍執初議
部議鑄二級用公運次受替馳赴熱河 行在面陳江浙情形不

同旋奉此後江浙白糧照舊運通之旨次日復傳詢江南白糧運丁次年何以願行漕糧有無改運京倉及運京之費何出公因押運各員尙未及見運費屬監督所司並以未能深悉覆奏再奉嚴議摺仍畱中會江南大吏疏中有督糧道等曾以此事申告總漕未經批發語遂革職時丙辰七月也公任漕運凡七載知無不言遇當糾劾雖要人無所顧忌時內外章奏多以其副白執政請可否公獨緘封直陳以此頗爲當路憎嫉此又公卓然大節人或有所未盡知也少孤貧事母至孝交友不以窮達易節身雖顯未嘗一日去書五經皆有謨述諸史於有明一代尤稱淹貫詩文下筆立就獨得雄直之氣旣罷官自以蒙上特達之知未忍遽

歸就逸僦居法源寺旁屏絕人事纂輯生平未成之書或以歸計
進輒怒然不語人亦無敢以此勸者居二年舊疾作以嘉慶三年
四月二十五日卒於寓舍距生雍正十二年十一月二十二日春
秋六十有五初娶史氏 誥贈夫人持家有禮法攻苦食淡戚鄰
稱之先公十二年卒再娶史氏 誥封夫人子三適安河南濬縣
縣丞署涉縣知縣後公一年卒適儀布政司理問職銜通羣女一
未字孫二人貽莊貽葆五年正月葬公某鄉之某原夫人祔焉禮
也懷玉交公垂四十載知公最稔其忍不銘銘曰 誥贈夫人
其才沛然兮其節卓然施於有政兮匪懈益勤初以爲苛兮久而
歸仁在唐維晏兮在宋則旆一蹶弗振兮并扈其年 帝方嚮用

今曾不少延歿而誰嗣兮爲世惜人我銘其室兮永固且安

右墓誌銘趙懷玉撰

公姓管氏名幹貞字陽夫一字松崖先世家濠州南宋時遷武進
六世祖陽春明禮部侍郎曾祖淑祖棟父景賢 贈如子孫官公
在母七月而生命憂不育父聞嘸聲嘉其氣足曰善撫可鞠也五
歲喪父母史氏嘗手錄鑑略課之年十一能屬文中乾隆己卯科
舉人丙戌科成進士選庶吉士授編修與修國史任撰文甲午科
分校順天鄉試乙未科分校會試丁酉科典試貴州旋充教習庶
吉士四十五年改陝西道監察御史巡視西城調京畿道御史謝
絕勢要請託劾左翼稅局濫罰牲隻又劾副指揮馬爲玘改供縱

犯革除胥役積弊後四年奉 命視漕天津北河挾沙流行向多淺阻武清縣楊村以雇船撥運累民有數歲不得釋至拆板者又山東閘外糧艘有無弁無丁者奏請添設剝船及自備船如所請行是秋轉掌京畿道復巡視西城大學士九卿科道會議秋讞公議由情實改緩由緩改矜者甚多皆中竅要某大僚後院廠有輿夫聚賭爲盜窟者或控其魁馬坤坤回人巨猾而富飭屬出不意擒之詰旦坐城械諸市勢要屬託者不及其冬奉 命巡視南漕旋遷戶科給事中時山東江南久旱雖大挑運道而漕艘仍阻公因奏請令地方官疏濬支河濟運並言宿遷竹絡壩不必分黃入運使黃河全力下注不致停沙得 旨諭令山東江南河臣疏通